

Pengurusan kewangan terkawal

PUTRAJAYA 27 Sept. -

Pengurusan kewangan awam secara bersepadu dan terkawal amat penting agar perancangan pembangunan negara dapat dilaksanakan meskipun berhadapan persekitaran ekonomi global yang mencabar.

Ketua Setiausaha Negara, Tan Sri Dr. Ali Hamsa berkata, pegawai-pegawai pengawal di setiap kementerian, jabatan dan agensi kerajaan sewajarnya memastikan pengurusan kewangan di organisasi masing-masing dikendalikan dengan cekap, teratur dan berkesan.

“Di samping pengauditan Jabatan Audit Negara (JAN), unit audit dalaman kementerian dan agensi masing-masing perlu memainkan peranan semak dan imbang dengan lebih aktif dan berkesan.

“Aktiviti-aktiviti negatif seperti penyalahgunaan kuasa, penyelewengan, pembaziran dan pemborosan dana awam perlu dibendung,” katanya dalam majlis penyampaian Anugerah Kecemerlangan Pengurusan Kewangan (Indeks Akauntabiliti) Tahun 2015 di Bangunan Perdana Putra di sini hari ini.